

Gou Mbouj Nyaeq Lo

我不小了



Youq ndaw lwgda daxboh daxmeh, gou ciengxlwenx dwg boux lwnyez maj mbouj hung ndeu. Swhgeij caeuq baengzyoux okbae guhcaemz, bohmei cungj daengq bae daengq dauq: Mbouj ndaej caemz feiz, mbouj ndaej luenh gwn doxgaiq bouxwnq.....Cigdaengz gou ok dou le cij dingz bak. Gizaed, bohmei

baenzneix guh dwg gvnsim gou. Hoeng, gou gig siengj doiq gyoengqde gangj coenz vah ndaw sim gou: "Gou mbouj nyaeq lo."

Lij geiq ndaej mwh gou hwnj it nienzgaep seiz, bohmei bang gou cawx le hauilai vwnzgi: Bit, cik.....Yienghyiengh cungj miz. Ngoenz haihag, mwh gou aemq aen daehsaw yaek bae hagdangz seiz, daxboh naeuz yaek soengq gou hwnj hag, gou naeuz hagdangz byaij yaep he couh daengz, gou rox gag bae, mbouj yungh soengq. Hoeng daxboh itdingh aeu soengq, gou cijnde i hawj de soengq. Daengz hagdangz le, gou heuh daxboh banringzgvaq gaej daeuj cieplou, gou rox gag dauq ranz, gou gaenq maj hung lo. Daxboh mbouj miz banhgap, couh dapwngq lo.

Banringzgvaq cuengqhag seiz, baihrog doek fwnmoenq, caeklaiq ok dou seiz gou daiq aenliengj, gou gang liengj byaij dauq ranz. Mwh gou byaij daengz bakdou ranz, raen daxboh daxmeh itcig ndwn youq bakdou caj gou dauq ranz seiz, raemxda gou doek-byoegbyoeg.

Daxboh daxmeh, gou mbouj nyaeq lo, sou mboujcaiq baenz causim lo, hoeng ndawsim gou ciengxlwenx gyaez sou!

(sam nienzgaep Couh Dungz)

Caeuq Saw Guh Baengzyoux

与书为友

Gou gyaez saw, gingciengz caeuq saw guh buenx. Seiz iq, gou mbouj rox geijlai saw, cungj dwg heuh daxboh gangigoj, baez dingq gojgaeq, gou couh sim' angq.

Doeg sam nienzgaep seiz, miz baez he, gou cam daxboh: "Mwngz baenzlawz rox gangj baenzlai gojgaeq ne?" Daxboh naeuz: "Saw dwg lauxsae iq, de rox son mwngz baenzlawz hagsib, baenzlawz roxsoq!"

Daj seizhaenx hwnj, gou baez miz seizgan, couh youq ranz yawj saw. Gou yawj saw mboujdanh mbouj mbwq, lij roxnyinh gig mizyinx dem. Gou daj ndaw saw hag ndaej hauilai cihsiz, sawj gou roxyiuj hauilai dauhleix. Gou ngoenz lawz mbouj yawj saw, couh lumjbaenz lumz gwn donq ngaiz ndeu nei.

Saw baenz baengzyoux cei ndei gou, ngoenznaengz gou cungj caeuq de doxraen.

Docih de buenx gou maj hung, docih de soengq hawj gou baenzlai cihsiz, docih de sawj gou bienq ndaej baenzneix maenh' ak.

(haj nienzgaep Vangz Lizfeih)



Banhaemh singgeiz haj, gou youq ranz sij cozyez, daxmeh cingq yawj densi. "Ling, ling, ling....." Dienhvah yienq lo, daxmeh dawz hwnj dienhvah baez dingq, laxlawz dwg daxboh haemh neix mbouj dauq ranz gwn caeuz, yaek youq baihrog gwn. Gou doq sij cozyez doq naemj: Haemh neix daxboh dwg mbouj dwg youh gwn laeuj fiz le cij dauq ranz ne, danghnaeuz gwn laeuj le caiq hai ci..... Gou yied naemj yied lau. 7 diemj, 8 diemj, 9 diemj..... Seizgan gvaq 10 diemj lo, daxboh lij caengz dauq ranz. Daxmeh hix you daxboh lo.

"Dung, dung, dung....." Sing bongx dou gvaq le, daxboh daengz ranz lo, gou caeuq daxmeh cijndaej

soeng gaemz heiq he. Daxmeh cam: "Baenzlawz byonghwnz cij dauq ranz ha?" Seizneix daengx ndang daxboh cungj haeu gij heiq laeuj, naj de hix hoengzoo, byaij roen saemxsaemx saxsax. "Song mehlwg cuengqsim ndei lo, gou mbouj fiz....." Daxboh gangj mbouj baenz geij coenz vah, yaep he couh naengh youq gwnz daenggeij ninz ndaek lo. Yawj daengz daxboh aen

yienghsiengq neix, gou caen siengj doiq de naeuz: "Daxboh, gou rox mwngz ngoenznaengz sinhoj guh hong, dwg siengj hawj gou caeuq daxmeh saedceij gvaq ndaej engq vuenyungz engq vaiqlag. Hoeng mwngz hix aeu gvnsim ndangdae swhgeij cij ndaej ha!"

Caen maqmuengh daxboh gaej gwn baenzlai laeuj lo.

(seiq nienzgaep Ganh Yijsenh)



Vat Duzndwen

挖蚯蚓

Singgeiz sam cuengqhag seiz, Lij lauxsae hawj dou buci hangh cozyez daegbied he: Vat duzndwen. Dwen daengz duzndwen, ndaw uk gou sikhaek yienh' ok aen doz baenzneix: Duzndwen uqlah daengx ndang cungj baenz boengz haenx, youq ndaw namh nod bae nod dauq, dwgcaengz raixcaix. Hoeng caiq dwgcaengz hix mbouj miz banhgap, cozyez lij aeu lauxlaux saedsaed bae guh.

Cuengqhag le, gou caeuq geij boux doengzdohi doxcaez bae vat duzndwen. Daxboh dingqny i dou yaek bae vat duzndwen, angqvauvau dwk naeuz: "Gou daiq sou bae, seiziq gou vat duzndwen ak lai bw!" Daxboh dawz faggvak he caeuq aen bingz he couh daiq dou ok dou lo

Lauxsae lwnh dou, duzndwen cei maij youq giz youh amq youh dumz haenx. Baenzneix, dou senj youq laj godauz hung he vat duzndwen. Daxboh mbak roengzbae, namh couh soeng liux, gou menhmenh mbek hai gaiq namh he, sikhaek couh yawjraen duzndwen lohgangh ndeu cingq ngutngeuj aen ndang de. Gou ganjgip gaeb de cuengq haeuj ndaw bingz bae, youhcai q dawz di namh he dwk roengz bingz bae. Youq dieg namh daxboh vat haenx, gou raen duzndwen he baez iet baez suk yaepyet couh mbouj raen lo, lumjbaenz caeuq gou doxndoj nei.

"Daeuj yawj vei, gou gaeb dawz duzndwen raezrangrang he!" "Va, gizneix miz baenzlai ha." "Duzndwen neix hoengzoo!".....Gyoengq doengzhag hemq dwk. Gou raen vat duzndwen baenzneix mizyinx, gen fwngz hix haenz lo, gou vax gvaq faggvak, baez mbak roengzbae, a, duzndwen he ngaiz gou mbak goeng lo. Song donh ndwen youq baihnaj gou diuqbubbub, lumjbaenz hemq, in lai lo, in lai lo. Daxboh naeuz: "Gaej lau law, duzndwen goeng geijlai donh cungj mbouj dai, donh mbouj miz gyaeuj haenx gvaq mbouj geij nanz couh gag maj aen gyaeuj moq he okdaeuj lo, donh mbouj miz rieng haenx hix gag rox maj rieng ne." Va, caen dwg saenzgeiz lai lo, siengj mbouj daengz vat duzndwen lij hag ndaej baenzlai cihsiz dem.

(seiq nienzgaep Vangz Yinghbauij)

Daxboh Gaej Gwn Laeuj Lo

爸爸别喝了

